





五言律詩

南唐益思堂文集

曲沃李次湖溫甫校梓

者章

正

上

玄象山館詩草卷第七

內史南師仲子興著草

豫章胡汝煥孟弢選正

新都汪元范明生編閱

曲沃李承顏溫甫校梓

侄南居益思受蒐集

五言律詩

送安榮卿之京

揚柳夾堤生携壺送子行何來汗血種老
去識連城落日千山渺飛鴻萬里鳴長楊
好自獻 聖主在承明

送蕭子晉文學遷巴西郡博六首有

叙

蕭君梓潼人也騷壇俊彥理學名
家安漢橫經渭陽鼓瑟含英漱澗
允矣境界秦唐誦德欽風卓哉淵
源鄒魯岐路傾蓋於今三年僕夫
在門便爾千里雖重鑪錘之望徒
增離索之思第念博士清曹隆州
勝地且于韶陳公者高卧白雲共
推赤幟君與女若揚子式廬請事
載酒分題異日吏治將閬水同清
儒才與錦屏併爛端有望矣仲也
陸沉窮海株守遐方仰山斗之無

從悵金蘭之載隔爰於君行勉賦
短什所媿才非七步終貽行李之
羞情托百年敢附河梁之義倘蒙
不鄙幸致陳公

一別何容易况逢歲欲殘君行元故里蜀
道豈爲難雪擁閣雲暮天空棧月寒錦屏
風物好切莫厭儒冠

其二

詩在誰能說年來自解願那堪陶亮徑漫
別馬融惟慷慨當筵曲淒涼後會期江頭
芳草色春到定相思

其三

春風安漢舊化雨渭城繁何事今朝去青
衿猶在門三遷官自冷十載道逾尊遙想
開尊處新詩孰共論

其四

自昔推蜀彦陳公更上才風塵厭簪組湖
海憶鹽梅人向隆中卧賦從鄴下裁亦知
無俗客懸榻待君來

其五

彈琴者誰子吾黨揚子雲如何雙鳥去不
遣尺書聞雷雨青萍合離愁白髮殷寄言
山逕裏伐木向斜曛

其六

握手情何極征輶且暫留相期惟不朽脫
贈祗吳鉤槐舍巴江夢漁竿渭樹爍朝來
君漸遠天際水空流

壽馬長公八十四首

瑞靄涵靈岳祥光繞大椿無懷常樂志得
道自全神化雨成均望圖書沙苑春寥寥
千載後渭北有垂綸

其二

古希唯七十翁已十年過把酒誰同輩譚
碁欲爛柯清時厭簪組白首卧松蘿聖對
山頭月悠然發彌歌

其三

九棘聲猶重三鱣事可驚孤卿元令弟耆
德自難兄徑曲莢花潤雲深海宦清只今
太史宅疇不羨長生

其四

對客宵常旦登山峻不扶問年還世有矯
捷似翁無何論莢三熟且看桂五株芳晨
彩戲處春色醉醞醕

贈歌兒文干

華館水晶盤春燈吐焰寒回文清玉骨柔
指撥長干閒雅人偏醉殷勤夜易闌紅顏
但自保聲價已邯鄲

太寧宮春集

東山自棟宇列坐敞南扉花鳥憐春莫關
河入望微清尊畱上客野唱對斜暉多少
登臨興憑欄思欲飛

夏日同益侄邀姚繼叔

微熱來初夏當簷欲共論君才元郢雪我
病自文園四海三更酒千爍一劔恩竹林
堪嘯傲未可問歸轅

有嘲余不飲者詩以解之

百篇能自至啜茗亦相宜忌醒言終幻當
壚事可疑何須壘塊作無用苜中爲囊裡
金貂在任他倒接羅

繼叔枉過次家嚴韻

相逢驚歲序花落自荒臺意氣無離合乾
坤任去來甌隨更漏盡燭並夜光迴潦倒
茅檐下含情望斗台

李母阮孺人輓歌十首并叙

南生曰余與晉人李承顏遊而知
若母之賢云往承顏之尊人芝山
公官于燕失配也遂繼於阮阮固
名家子亡何尚書公即其鄉爲聘
今太宜人呂兩弗知也書聞芝山
公重父命阮承夫子之志遂殫然
紆體亡吝色即呂亦心儀阮舉壺
以內聽焉論者兩難之洎芝山公
曳裾秦蜀王門也秦蜀王亡不謂
李相國賢者即亡論阮之助種種
蜀時兩中貴爭柄譖于王王聽弗
聰將殺見譖者以萬金囑芝山公
公語阮阮曰此爲鍛練地耳事苞
苴以斃三尺仁人弗爲也芝山公
笑曰得我心矣謝弗受竟爲理出
此其却金履善儻所謂女丈夫非

邪釐三十載翼翼懍懍唯墜先業
是懼貽貲弗支鼃夕每脫簪珥取
給焉躬泝澣指手至胝龜夜分猶
事機杼以督諸子學綺縠戴白不
御至憫惇恤困即傾籛中一勿問
之安謂非賢母哉生二子承順諸
生承顏鄉進士俱奇男子承顏方
伏葭由恫祿養不逮乃丐言綴辭
家以闡先媿走使渭上謂南生忝
在石交即不文烏容墨墨已也輒
忘荒穢十韻遂成載引其端以俟
采風者攷焉承顏之弟曰承志呂
宜人出今秉憲關右爲時聞人則
阮亦與有助云

自昔非流品於歸揔德門燕臺矜彩鳳姑
射羨名媛洵媵家聲舊冰霜壺範尊只今

返元化何處叩天閤

其二

結縞禁苑日琴瑟動朱絃
紉綺身誰御蘋繁意更便
上堂慰白髮舉案佐青編
莫以深閨裏芬芳未易傳

其三

蜀秦推相國內助豈無名
柔遜馮天性紛華薄世榮
全生千古誼卻餽四知情
女誠

光圖史何人續管城

其四

憶與梁鴻別蕭條沁水頭
愁深華表雀魂斷峴山秋
捲幔風悲樹捷關月淡樓
辛勤那可問無語淚空流

其五

諸子蒲梢種義方賴母功
青燈欲斷杼絲髮已丸熊
脫珥共賓客解衣拯困窮
寒寥

叔季世猶見古人風

其六

詎意涼風發飄飄共夜臺長離今再見含
咲復何猜嬰白當年志松楸莫雨袞總惟
香篆縹遙想奠寒杯

其七

一失斑衣願年來擗踊勞儀刑空在望環
珮若爲遭蘭殞香猶遠珠沉價自高楊親

維令子行見荷綸褒

其八

石門豐碣舊高里素旌新劔化龍俱奮簫
殘鳳並湮世垂居室範家有亢宗人此日
招魂處應霑道路巾

其九

仲子金蘭契夫人素所諳栢舟應不忝承
諱揔何堪婺歛條山北鴻飛渭水南空懷

執紼意悽愴阿戎談

其十

平居耽節義企慕動深思欲擬大家傳慙
無中壘辭生芻凌露潤畫翬度笳悲極目
關河上黃雲暗路岐

次韻慰秦女睦比部悼弟四首

達人齊物理吾道竟黃泉浩渺無窮世參
差有限年荆花何用歎薤露自成篇明月
猶如昨丘墳遍舊川

其二

人生一逆旅無復計存亡爾我心猶赤風
塵鬢已霜愁懷聊自遣世態揔堪傷此際
相安久因君憶鴈行

其三

生平苦不樂切莫自傷神姜被雖縈慮熊
丸賴有人還從捧 詔日暫是作舞斑身曲

曲鄉山意尊前共爾陳

其四

吾亦有心者強爲病裡歡
埴簾幾載斷菽水此身難
雲鎖鷓原暮風摧池草寒
承顏吾輩在但保百年安

寄別伯明進父元芥季量四宗侯張

致鄉山人四首

匹馬遊京國臨風辭故知
顏衰悲短褐病在重鄉思
繡虎浮名薄屠龍壯志疑
於今那可訴兒女咲相欺

其二

落拓難諧俗吾儕意氣存
到來常下榻何處說酬恩
花月偏容醉風騷幾憚論
歸家三逕寂令我憶平原

其三

平子千秋士王孫一代雄
交情貧轉篤詩

句老逾工君價應連璧吾生合斷蓬玄亭
煙樹渺慷慨別離中

其四

風閣瞻仍遠行行歲又殘鷄鳴函谷月楫
擊大河瀾書劔襟懷濶風波世路難相如
遊自倦擬共曲江歡

司封弟約園臺玩月偶雨詩以貽之
吾弟山濤興臺深長薜蘿共期明月至無
柰雨聲何玉兔天邊暗湘雲夢裡多陰晴
元爾爾移席願相過

雨晴促五弟園臺之約

晨起頭方櫛晴光照眼鮮春花切莫負夜
月幾回圓欲共蘇門嘯寧忘剡水船今宵
臺畔酒肯自醉嬋娟

春日偕益侄暨祓禠諸君子遊五臺

六首

名山元勝覽登陟及芳辰雲向車邊度苔
從屐底新石凌疑帟踞樹古帶龍鱗共擬
空同上相將問道真

其二

蒼煙寶殿合松栢鬱參差一窟藏真處雙
盆洗藥時寧知宦髮變不共鹿門期獨有
忘機鳥翩翩慰所思

其三

絕巘孤城外通天有一門鳥啼依澗竹犬
吠隔溪村攀磴花生袖彈碁雨滿樽何須
論勝負吾意任乾坤

其四

羽化空冥漠浮生信有涯河山驚世代煙
樹變人家醉漱溪邊月狂塞崩畔霞翛然
風雨至落盡武陵花

其五

高隱人何在
龍從自五臺
橋危春水暗
洞敞莫雲來
屢卻徵賢詔
還欽濟世才
文園多病後
落日漫徘徊

其六

正喜塵襟豁
悠然感慨興
雲深山隱見
逕曲石峻增
蒿沒空秦苑
鳥飛自漢陵
遲回天色暝
兩岸忽漁燈

問五弟村居

念爾幽棲意
無妨近市闌
開塲臨渭水
倚杖看青山
問字誰能過
忘機鳥自還
欲携尊酒往
把手聽潺湲

孝安皇后輓歌二首

鳳馭登遐日
鸞禕輟御時
六宮思壺範
四海失坤儀
桂殿雲光冷
椒塗月影移
今皇懷聖主
善撫鏡有餘悲

其二

露浥姜嫄殿風淒堯母門親蠶無履跡攀
竹有題痕彤管徽音遠金閨懿烈存猶思
承祀日肅肅事蘋蘩

冬至齋居院中二首 館課

令節當長至清齋向石渠氣回金瑄外星
轉玉衡餘朔雪明虛砌寒松對靜居寥寥
僊院曉雲物正堪書

其二

齋沐關初閉凝然白玉堂律將灰並動日
與線俱長鶴步侵寒色烏飛帶曙光淺才
慙珥筆無以咏明良

金莖承露篇 館課

玉掌依僊闕金莖立漢宮亭亭元氣逼耿
耿曙光通柱出浮雲外盤承湛露中願將
和大藥靈壽永無窮

賦得辟兵符 閣試

朱戶懸青艾華筵泛綠蒲綵絲傳令節金
縷織靈符文繡爭新製丹砂擬舊塗何言
辟兵佩遺俗在名都

恭睹 承天門頌 詔赦有述 閣試

聽漏趨閭闔宣恩望 帝臺龍墀百辟侍
鳳 詔九霄開澤自同天地仁應徧草萊
莫教空挂壁定使網羅開

賦得明堂柱石 閣試

天高雙柱石特立向明堂遠接雲霄色常
懸日月光龍蟠千古勢鳳翥萬年芳朝會
趨冠冕瞻依奉 聖皇

寄蕭李馨兼憶楊子立四首

一與將軍別翛然秋復春病緣愁轉劇書
藉鴈來頻鎖鑰金城重文章白髮新寒梅
猶自艷聊寄黑河濱

其二

燕市追陪日青燈每夜分殷勤斗酒外意
氣五雲深豈我能譚武唯君雅好文相思
何處笛淒切不堪聞

其三

異時西夏變平虜自高名已控三千塞何
言七十城謳歌秦士女推轂漢公卿此日
遼陽外紛紛羽檄生

其四

每從花月下輒憶高陽徒世態驚風雨交
情乍有無千山心盡折一夜眼堪枯何事
求羊輩飄零未可呼

送張文仲還魏兼寄張伯簡太守二

首

文仲善
繪事

詎意朱明候河橋唱渭城生涯任流水踪
跡咲浮萍天地尊前盡煙雲畫裏生相思
馮塞雁到日正南征

其二

平生張伯子燕市憶呼盧老去書難達愁
來病未蘇君猶厭紱冕吾豈薄江湖明月
叢臺上人憐郢調孤

玄象山館詩草卷第七

玄象山館詩草卷第八

內史南師仲子興著草

東萊原一魁仲文選正

蘄春冠學海巨源編閱

魏郡崔邦亮德嚴校梓

弟南企仲伯稚蒐集

七言律詩

岳武穆祠

歸然遺廟帶漳流千古吞胡恨未休露冷
荒堦青草莫鳥啼畫棟白雲浮金牌齊下
三軍淚玉輦空隨五國燧此日威靈傳塞
外焉支驕虜亦含愁

東華門隨兩兄候朝

時同伯兄計偕
仲兄入覲

華萼榮分湛露餘淺才何幸覲公車春回
鳳闕鶯初轉雪霽龍墀柳漸舒曉色乍寒
雙赤鳥爐煙遙散萬言書不從狗監稱知

已敢望 君王問子虛

廣川哭二兄不寐

佇立閒庭玉露沉遊魂縹渺淚霑襟紫雲
虛映樓中賦花縣真亡匣裏琴往事幾回
傷雁影遺編徒自悵龍吟遙思渭北池塘
夢清夜還依棗萼陰

送伯稚弟赴試

遙瞻佳氣映層城年少今為上苑行自念

無才堪致主何如有弟足蜚聲春風擬奏
龍池賦穉月先題雁塔名錦爛花香回首
處重闌此日正含情

秋夕同子秀邢舜羽過進父宗尉玩
月次韻

帝子西園集上賓相看誰復問歸輪香銷
銀燭歌逾壯露襲織羅舞更新隔坐風回
三徑菊中天月照五陵人清宵佳會知能
幾潦倒尊前咲此身

覃懷別大兄

千山樹色正蒼蒼兄弟天涯意渺茫獻筴
當年悲季子佩刀此日羨王祥淹留明月
聊同醉飄泊浮生且任狂別後扁舟歸棹
急不堪回首莫雲長

秋夜寄懷子秀兼致客生常吉書用
都門留別韻四首

盧龍河畔送君後我亦重為故國行湖海
一身唯酒債中原數子自詩盟雕蟲歲月
淹投筆戎馬關山負請纓此日夢回沮水
上白雲片片揔含情

其二

三徑漫開東郭外蕭然藜杖白綸巾看花
陶令非關酒閉戶原生豈為貧懶慢常辭
問字客飄零翻憶和歌人可憇眼底誰知

已野雀閒庭意自親

其三

渭城煙景還如舊秦國風光近若何別去
三春楊柳暗愁來一夜雨聲多逍遙梅福
元僊隱慷慨平原自醉歌欲寄相思天共
遠迢迢雙鯉度關河

其四

憶共春風燕市筑于今秋色揔堪憐誰家

玉笛悲荒塞何處清歌促黛筵鴻雁遙凌
太白月孤舟漫繫渭河煙詩成永夜渾無
寐葉落空齋思正玄

沉香亭留別朱進父昆季得沉字

荒堦幾度共追尋把手誰憐此際心芳草
不隨青輦盡寒梅空鎖白雲深馬頭見鴈
愁偏劇醉裡看山日易沉別後願言同努
力只今無復淚霑襟

衛源逢劉介卿雪中留飲

幾年湖海重相思岐路相逢歲杪時君向
狗屠憐意氣誰從龍匣惜雄雌黃河渡口
秦川月白雪尊前楚客辭明發離亭分手
處不勝天外暮雲垂

次韻送孟弢還豫章

把臂長歌五夜殘朝來猶自倚雕闌遙瞻
鴻鴈傷春莫欲折垂楊惜曉寒此去有堂

堪戲彩幾回落羽負彈冠送君我亦西歸
者華岳潯江路共難

送紀鳴遠還關中

矯首狂歌五鳳城死生一日為君輕如何
懷璧俱難售征馬蕭蕭先我鳴目斷行雲
迷雁影心隨流水送歸程關門倘遇當時
吏莫自殷勤說姓名

別湯義

憶別當年柳色新何堪此日更霑巾一尊
還對燕山月萬里依然關塞春多病豈緣
明主弃有懷轉覺故人親匡時知爾非流
輩但得雙魚慰隱淪

別趙久甫

把臂當年意自親春風分袂玉河濱花飛
忍向愁中劇鶯轉那禁別後頻天路爭看
驥首客窮途誰念著書人明朝匹馬思君

處極目悠悠揔愴神

別賈張二子有敘

癸未春余同賈魯玉上書公車不
報魯玉留滯京邸欲博一官余束
裝將歸值張子仲霑復以謁選至
百年知己會晤無常觸景傷懷泫
然鴻袂遂成短韻用志別悰

清時為念賈生才岐路還驚張仲來鄉思
遙隨雲影亂離筵忍傍杏花開草玄予老
揚雄宅市駿君憐郭隗臺落日一尊無限
意飛鴻萬里揔含哀

用韻再別諸同好

何言搖落濟時才且向風塵任去來多病
最憐春色莫狂歌翻覺咲顏開孤鴻幾度
函關月五柳還依密時臺為道百年應努
力天涯萍散未須哀

清風店望石將軍戰場有感

當年曾讀戰場歌
此日來經感慨多
漢將旌旗空草莽
燕關襟帶自山河
荒村晚映春流急
野樹寒迷莫鵲過
鳥盡弓藏千古恨
扁舟誰泛五湖波

覃懷朱子得太守同諸寮邀飲濯清亭賦贈黃三季主

高閣開筵敞四扉
太行縹渺白雲微
橋邊流水涵新月
坐上飛花落故衣
湖海詩名曾入夢
風塵病色暫相依
主人賴有清狂興
不醉醞醕莫遽歸

雨中得黃季主書兼以近體見懷依韻述意

披襟獨坐意如何
對景蕭條一放歌
細雨連宵牽遠夢
雙魚此日渡長河
開函詩句愁中見
憶別雲山望裡多
自歎淺才甘偃

寒清時憐爾亦蹉跎

午日朱太守邀飲劉司理吏隱亭

吏隱亭閒法署中蒲觴此日慰途窮雲開
樹影搖新月雨過花香度晚風辭賦江淹
君自擬踈狂阮籍許誰同但令交態千穉
在不向天涯歎轉蓬

覃懷夏日同朱子得太守魏懋權奉
常劉介卿司理飲濯清亭時魏有臯

蘭之役二首

長夏相過復此亭更逢青眼慰飄零百年
意氣人連壁一夜風雷客聚星世故漫從
花底問清歌頻向醉中聽倚闌頓覺煙塵
息唯有漁舟傍晚汀

其二

侍臣持冊出承明把手橋頭意自傾憐我
春來常抱病逢君西去若爲情黃河曲裡

愁心折華岳峰頭逸氣橫遙憶星軺初駐
處掌中彩筆五雲生

懷州憶魏二懋權時奉使秦中

岐途杯酒斲同群別後魚書杳不聞曾向
漳河惹魏武更從函谷憶田文雙旌曉映
千山月疋馬秋衝萬里雲為愛風騷還勝
賞詞林振羽孰如君

別兄渡河

昨夜尊前意若何曉來猶自歎蹉跎白雲
飄靄鄉關莫芳草淒其驛路多天地一身
歸華岳風煙幾度見黃河雁行南北空流
水忍向扁舟聽棹歌

次朱進父九日見憶

敢向飄零說倦遊風塵蕭瑟仲宣樓黃花
幾共青尊放錦字遙聯白鴈浮別去龍光
分五色神來兔穎擅千秋相思此日因君

劇極目雲深曲水頭

賀楊文學誕子

貴陽才子蚤知名幾載春風滿渭城已羨
縣孤綿世業何妨鼓瑟坐諸生堦前桂發
燕山秀掌上珠看合浦明夢入鄭蘭君已
叶石麟端不屬徐卿

夏日同諸友渡渭讌陳子獻村居次
韻

夏日山林野趣多故人張宴俯清河孤航
雲日元相媚一徑煙花漫自過霞絢彩毫
幽興劇月橫瓊竿醉顏醜烏啼庭樹賓初
散隔水猶聞子夜歌

秋日過進父元斧季量三王孫樓燕
得論字時雨寒元斧輒解衣衣我矣
數載相思夢寐繁今來猶自問銷魂五陵
佳色樓中梔三載新詩坐上論寒入綈袍

憐范升尊開秋雨醉平原人生離合真萍
梗潦倒欣看意氣存

重過季量醉月樓

憶昔逢君醉月樓開窓猶似舊時秋黃塵
冉冉凋雙鬢白雪翩翩照敝裘葉落千觴
酣北海雨深一榻卧南州明年此日知何
處徙倚危欄望斗牛

九日友人過草堂登眺

南山疊抱草堂前堂靜山青興渺然一壑
秋風三徑菊孤城斜日萬家煙登高不負
囊萸約題句欣同落帽天酩酊但教酬令
節馮闌莫問杖頭錢

哭張惟訓

落木蕭蕭滿夜臺三朝文物揔含哀我從
岐路招魂至誰向衡門問字來霜管千穗
回日月青萍一夕泣風雷可憐空負當年

意淚灑黃雲晝不開

燕臺聞笛

三月春光滿上林鶯聲柳色揔難禁雙龍
影向函中見短髮愁從鏡裡侵何處關山
驚玉笛無邊風雨暗黃金梅花落盡猶爲
客故國雲連太華岑

梅公岑給諫冊封關西便道過訪兼
得伯氏客生固安書

索居炎夏思難禁愛弟傳書到竹林此日
桐分秦塞遠幾年梅發薊門深當筵紫氣
回銀燭長跼霞光映碧岑明到方城勞問
訊酒人生計揔銷沉

次韻答孟弢見寄

目極匡山秋又分故人消息那堪聞從來
意氣憐同調更向飄零思不群萬里寒暄
空灑淚百年風雨幾論文我今自笑無昏

嫁欲買扁舟一問君

謝客樓居散髮長卧左圖右史頗足
自娛大火西流蕭條滿日馮闌憶舊
頓生遠心迺知一日三穗良有以也
爰筆賦此

層樓高卧帶斜暉事業于今願不遠簾捲
河流秦塞莫窓銜岳色漢宮微圖書四壁
無新社風雨千秋只舊磯感甍築幾回驚短

髮那堪鴻鴈望中稀

得劉子大金吾書

八月關門塞鴈哀尺書遙自五雲隈當時
敢謂將軍重異日終憐上客才江海懷人
空有賦風塵抱病幾登臺于今扈從饒閒
暇千里知君憶草萊

咸陽別楊令

咸陽河畔草蕭騷羨子清時已夢刀尊酒

鬢留天上鳥孤燈寒照坐中袍猿啼劍閣
千峯月路入巴江萬里濤政暇試尋揚子
宅他年治異屬詞曹

哭鑑麓伯丈

服鳥遙來上苑東漢京辭賦為誰雄祇餘
叢菊新開逕無復三巴舊避駉玄宦月矚
悲古樹杜鵑風靜泣殘紅匣中剩有相如
草夜夜寒光照碧空

懷胡元瑞黃季主

龍鱗一自雄雌失魚素那禁歲月沉莫訝
交情頻按劍却緣塵世幾同心太華雲繞
金華遠湘水愁添渭水深辭賦只今吾黨
在酣歌何日鳳城陰

玄象山館詩草卷第八



